

Kayëta ir Tit in Lilaya in

Kayëta ijo Pol yëgwën baŋo Tit, ar enga endexëm gër epemëra ed Atëfëtan and Yesu Kërisët an. Afel fel baŋo Tit ebi yata bëlëngw bër bamara band gër ošir or Këret. Axwitan xwitan baŋo mondake yäpëk eni gi bëlëngw bër bamara bën. Bëte afelëra felëra baŋo Tit mondake yäpëk exo dīyand šenene gër Amara: gë bëxarëk bën, gë bësoxari bëbeja bën, gë ocambenjar gë odënaŵ ok, do gë okadëp ok. Mëŋ alëngw an yäpëk eno tëfëtëlinde. Afel fel baŋo bëte Tit kërebi teš na bësëyali bënëgwëš bën eni tëyalind bend gë ofëcak këm beŋ. Er ex gër akayëta in:

End osëyali or Pol eŋ: 1.1-4.

End ola or bëlëngw bër Amara eŋ: 1.5-16.

End aniyän and gër Amara eŋ: 2.1-3.11.

Ofelar ol: 3.12-15.

Ecëmar el

¹ Wëno Pol, ariyenin ar Kaxanu an, kë yëgwënëlinde kayëta ijo ro. Parëxanda hi këme, Yesu Kërisët do gë Kaxanu fana këne mëni nangënënd end däl eŋ bër sana kënebi bën, eno kwëta, eni dīyand ang këbi yändind ak ² do eni yarënd aniyän and din ir din aŋ. Damana exo dixën ngwën in beya babi Kaxanu aniyän aŋo, xarak mëŋ axo nëgwëšënd na. ³ And ħatan këŋo Kaxanu, mëŋ ar ex afexën arebi aŋ, anëcëtëgu

nécëtëgu ko eyeyan edexëm ed xwëtënan ke me pemërand el. ⁴ Tit, wëj ar hik enim asëñiñwën, ga ßar ke ekwëta edebat an, ašëma këmi šëmand. Faba Kaxanu do gë Yesu Kërisët, Axwën areßi an, yëlëleni oyekax ol do gë oßetak ol!

End bëlëngw bër amara eñ

⁵ Wëno er seboxënëgu këmi gër Këret in ex, ey pañ eketënëgu ed bëbër ßayi bax el, do bëte eyëßi tana bëlëngw gër Amara and angol kala, ang fel bami ak. ⁶ Ala ar këyo sana exo gi alëngw an, gilexo icën ind asoxari abat fo, ar gë end këno nëp këm. Bëte gilexo sëm ir obaß or wäk end Yesu, or ax ñac ex na, or ax mëšind na. ⁷ Enimin, añap ñapëk alëngw ar amara an exo gi ar gë end këno nëp këm, gayikako ar xwëtënan këno bënd Kaxanu hi ko. Kërexo pufënarand na, kërexo gi na xoñët xoñët, kërexo gi na ašëß, kërexo gi na axeñax, kërexo caland na exo cot kodí in gë osëmbak. ⁸ Barikan gilexo ar këbi lëkayand aye bëliyer, ar ñanëk enjekax, ar šenene, arenik, awënëk, ar xamëk emëlaya ed gaf irexëm. ⁹ Kwëtalexo aye eyeyan ed ßal el, bayilex ang sëyali këno ak, exo koraxënënd ebi kemën gë osëyali or šenene ol, do ebi masinaxënënd bër kë šampërend bën ang këni lifënd ak.

¹⁰ Enimin, moñëmb ñëmb këni bëwëšik bën, bësëyali bër benëgwëš bën, do gë bënambeli bën, adofa gër enga end Bëšëwif bërëwäk end Yesu. ¹¹ Bëjo ñapëk eyëßi cëmin gayikako yer oxun oñ këni wëlënd gë osëyali or enëgwëš or

këni šotaxënënd kodfi gë osëmbak ol. ¹² Ar hi këni ebar ebat do hi ko alawñenel re këbi: «Wën Bëkëret bën din bënëgwëš hi kën, ang oŵacar oxeŷax fo hi kën, bongëleŷ bokwëlaraxik hi kën.»

¹³ Osede olo đal dëŋ ex, mëŋ ex dexërayindëbi mbaŋ eni cotaxën ekwëta ekemax. ¹⁴ Tebëlexëni obaxët or benëgwëš bend Bëšëwif ol, bend ex bapela band bela bër kë ħëpënd đal beŋ. ¹⁵ Er ex yo, awñenën wñënek gër bëwñënek, bari ŷoweŷ ax men ex na gër bër buyarënyak, do hi këni gë oŋëpëgënan bën: onden ondebën oŋ buyarëk. ¹⁶ Mondako këni sošanand mène anang nang këno Kaxanu. Barikan bandixa bandebën baŋ këbi fëlëtënd. Bëjo bër mocus exëni, bëwëšik exëni, bër kë sëkwanënd eni di enjekax exëni.

2

End osëyali or đal eŋ

¹ Wëj cëŋ, pelindëbi bend rek osëyali or đal beŋ. ² Pelindëbi bësosaŋ bëxarëk bën eni gi bër gë anjus, bër mopëb, bërenik, bër xemëk gër ekwëta, gër ebal ed bela, do gër ebuŋan.

³ Pelindëbi bësoxari bëxarëk bën eni điyand ang bër yëlayak gër Kaxanu fo. Këreni gi na bërëna bër bela, këreni gi na okađëp od ekurelira ed ngoy. Tëyalindëlexëni enjekax eŋ.

⁴ Masinindëlenëbi bësoxari bëbeja bën ang ŷapëk ebi balënd end bęcën bëndebën do gë obaš orebën ak. ⁵ Tëyalindëlenëbi eni gi bësoxari bër gë anjus, bëwñënek, bër ye këbi onden, bër kë fëŷëpëŷënd bëciw bëndebën, bër

bēngw kēbi onden, bēer kēbi baxētēnēnd bēcēn bēndebēn. Ata bayik ala ax ñana na exo denand eyeyan ed Kaxanu el.

⁶ Pelindēbi bēte ocambenjar ok do gē odēnaŵ ok eni gi bērenik. ⁷ Gēr ga hik yo, wēj dēŋ aŋap ŷapēk ey gi ar motēfēteli gēr benjekax bēnd kēy rind. Do and kēy sēyalind aŋ, ola oreŷ ol gilex or dāl, or mopēb. ⁸ Gilex bēte eyeyan emēnēk ed ala ax kor na exo cembēt. Angēmēne mondako ex, ata kēŋo wēlandēra ar kēbo ŵañērelind an do eñēŋēnax end kēbo yēlan, axo cot na.

⁹ Pelindēbi okadēp ok enēbi wēlēnēnd gēr beŷ dek bēxwēn bērebēn bēn, eni kemēnand ebī nēnganaxēn endebēn eŋ, kēreni campērend na er kēnēbi felēnd in. ¹⁰ Bēte watiyindēlex gēr ola orebēn mēne bēer mokwēta hi kēni, ŷoweŷ kēreni dekand na. Mondako kēni fēbaxēn osēyali or Kaxanu, Afexēn arebi ol.

¹¹ Gayikwa aŷanaya ŷanayak gēr bela dek oyekax or Kaxanu or kē yēlēnd apexa ol. ¹² Ata oyekax olo kēbo sēyalind ene kwēŷētande becusēsūs beŋ, gē oñandi od gēr ngwēn ro ok do ene cotaxēne gē okey oko dēŋ, aniyān and gē orenik, and gē onden, and ŷenene, and kē wēlayand bēnd Kaxanu. ¹³ Mondako kēne ŷēnixēne er gē onēnga ir kēne yarēnde in, do gē akey and kē ŷanayaw enjaran end Yesu Kērisēt aŋ, mēŋ ar ex Kaxanu, ar xwēn kēbo do fexēn kēbo an. ¹⁴ Mēŋ dēŋ yēlayak nē endebī ebo dacētaxēn gēr eñēŋēnax end ex yo do ebo mēnēn, ene gixēne bulunda ir xwēn ko, ir kē balēkēnalind edi ed benjekax in.

15 Mondako ÿapëk eyëbi tÿyalind, eyëbi kemënënd do eyëbi wërëŝëtënd gë đek or gapak or ŝot këy ol, ala kërexî yaf na!

3

End aniyan and oxëreceŋ eŋ

¹ Kwitanindëbi bërëwăk bën mēne aÿap ÿapëk enëbi baxëtēnënd bëlēngw bën do gë bēmun beŋ. Diyindēlexēni er këni rend in, do gindēlexēni bēwēlëk eni di enjekax end ex yo.

² Pelëlëbi eni gi bër mongwēlër, bër bēngwëk, do eni nēnga gër bela đek, ala këreno denand na. ³ Enimin, biyi bēte đamana enëjo nange Kërisët, er hi bane bēfēnirëx, bēwēŝik, bēnambërak, okadëp od oñandi oñēñenax do gë od bēnēngax bētēmbak. Mbaŋ xeÿ bane, do baŝo yakëraxirand, bane xoÿëndērēnde do bane ŝusērēnde andëbi rebî aŋ.

⁴ Barikan and ħatan këjo Kaxanu Afexën arebî aŋ,

wăsin këbo biyi bela bën oyekax orexēm ol do ang ħan këbo ak. ⁵ Nē end axaÿēnan irexēm fo rixēn ko mondako, bari ax gi ex na đe ga ri këne bēnd ŝenene. Afexën fexën këbo gë xobuyi or andēwă angaŝax ol do gë enēngwēt ed ko nēngwētēnd Angoc Amēnëk el. ⁶ Kaxanu yël këbo đēm Angoc Amēnëk aŋ paŝ gë Yesu Kërisët, Afexën arebî an ⁷ ebo kwētaxēn bër ŝenene paŝ gë oyekax orexēm ol, ene cotaxēne aniyan and din and këne yarēnde aŋ.

⁸ Awa eyeyan elo d'fal ex do aŷandi ŷandi ke eyēbi kēnēnanēnd b'ēr xwēta k'ēŷo Kaxanu b'ēn gē obal osēm ebi b'ēroxēn edi ed benjekax el. Awa eŷo ayeyek do ofēcak or b'ela ex! ⁹ Barikan kwēŷētal oyeyandēran ofēnirēx oŷ, gē or b'end bandēw'ēra oŷ, gē oxey'ēr oŷ do gē ecembētēndēr ed nē end acariya and Moyis el gayik dek b'ēŷo ax űap ex na, ofēcak kēm ex. ¹⁰ Ar kē w'ēlawēnd bakucara g'ēr amara an, pelēralo amat xali baki, b'ari űw'ayido angēmēne axi baxēt ex na. ¹¹ Anang nang kēy mēne ala arako rako an, asēmbak ex, ar kē w'ēndērand ex do gē andexēm d'ēŷ ko nēpayand.

Bapela bapelatar baŷ

¹² And kēmo law'ēnēli Arētemas ba Tišik aŷ, kemēnayid' eye kacali g'ēr Nikopolis gayik g'ēr emēkw edam faŷ kēme exe kuca f'ēn amēd and gē ayem aŷ. ¹³ Kemēnal eyēbi yēl'era šēlafana, Senas, asēyali ar acariya an do gē Apolos eni kucaxēn g'ēr d'amana ireb'ēn, ŷoweŷ k'ēreni can na. ¹⁴ Aŷap ŷap'ek b'ēmaŷe b'endebi b'ēnd ex b'ērēw'ak b'ēŷ eni t'ēya egi ed b'ēnēngax el, do gindēlexēni din b'ēwel'ek g'ēr edi ed benjekax, enēbi dēcaraxēnēnd b'ēr šēmura kēbi mbaŷ b'ēn; k'ēreni d'iyand na wa gē ofēcak kēm.

¹⁵ Awa b'ēr enga endam b'ēn dek ki šēmānd. Cēmalēbi b'ēr ex ofawo odebi ga b'ar kēne ekw'eta ebat b'ēn.

Kaxanu yēlēleŷun w'ēn dek oyekax ol!

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: (Oniyan)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

8b7902f3-5e35-5b89-86b2-c6da1be458b9